



Broj/Број: 01/2-50-1-2-2/07
Sarajevo/Сарајево, 12.03.2007.

ZAPISNIK

2. sjednice Komisije za vanjske poslove Predstavničkog doma Parlamentarne skupštine Bosne i Hercegovine, održane 21.02.2007, s početkom u 13 sati i 30 minuta

Drugom sjednicom Komisije za vanjske poslove Predstavničkog doma PSBiH predsjedavala je Borjana Krišto, predsjedavajuća Komisije.

Sjednici su prisustvovali sljedeći članovi Komisije: Borjana Krišto, Milica Marković, Azra Alajbegović, Sadik Ahmetović, Denis Bećirović, Sefer Halilović, te Merdžana Iglica – Sekretar Komisije.

Svoje kašnjenje na sjednicu najavili su Azra Hadžiahmetović i Milorad Živković.

Odsutan je bio Husein Nanić.

Sjednici su prisustvovali i pozvani gosti kao i predstavnici predlagača, ministar vanjskih poslova BiH, Sven Alkalaj i predstavnici Sektora za međunarodno pravne i konzularne poslove Ministarstva vanjskih poslova BiH, Zoran Perković i Radomir Bogdanović, potom predstavnik Ministarstva sigurnosti BiH, Samir Rizvo, predstavnik Ministarstva komunikacija i prometa BiH, Ismet Šečić, predstavnik Ministarstva finansija i trezora BiH, Miroljub Krunić, predstavnik Ministarstva vanjske trgovine i ekonomskih odnosa BiH, Safet Šerifović, predstavnik Ministarstva za ljudska prava i izbjeglice BiH, Amela Hasić i predstavnik Ministarstva Pravde BiH, Jusuf Halilagić.

Zapisnik je vodila Merdžana Iglica, sekretar Komisije, Alma Močić i student stažista, Maja Čvoro.

Za sjednicu je predložen sljedeći

DNEVNI RED

1. Verificiranje Zapisnika Konstituirajuće sjednice Komisije za vanjske poslove Predstavničkog doma Parlamentarne skupštine Bosne i Hercegovine, održane 15.02.2007. godine;
2. Davanje saglasnosti za ratificiranje **Sporazuma između Vijeća ministara Bosne i Hercegovine i Austrijske savezne vlade o readmisiji osoba koje imaju ilegalan boravak** (Ministarstvo sigurnosti BiH);

3. Davanje saglasnosti za ratificiranje **Sporazuma između Ministarstva sigurnosti Bosne i Hercegovine i Saveznog ministarstva unutarnjih poslova Republike Austrije o policijskoj suradnji** (Ministarstvo sigurnosti BiH);
4. Davanje saglasnosti za ratificiranje **Sporazuma između Vijeća ministara Bosne i Hercegovine i Vlade Kraljevine Švedske o pojednostavljenoj proceduri readmisije osoba koje nemaju dozvolu za ulazak ili boravak** (Ministarstvo sigurnosti BiH);
5. Davanje saglasnosti za ratificiranje **Sporazuma između Vijeća ministara Bosne i Hercegovine i Vlade Republike Slovačke o suradnji u borbi protiv kriminala, a posebice terorizma, nedozvoljene trgovine narkoticima i organiziranog kriminala** (Ministarstvo sigurnosti BiH);
6. Davanje saglasnosti za ratificiranje **Sporazuma između Vijeća ministara Bosne i Hercegovine i Vlade Republike Slovačke o readmisiji osoba** (Ministarstvo sigurnosti BiH);
7. Davanje saglasnosti za ratificiranje **Konvencije o policijskoj suradnji za Jugoistočnu Europu** (Ministarstvo sigurnosti BiH);
8. Davanje saglasnosti za ratificiranje **Sporazuma između Bosne i Hercegovine i zemalja Beneluxa (Kraljevine Belgije, Kraljevine Nizozemske i Velikog Vojvodstva Luksemburg) o readmisiji i ponovnom vraćanju osoba koje su ušle i/ili borave bez ovlaštenja i Protokola o provedbi Sporazuma između Bosne i Hercegovine i zemalja Beneluxa (Kraljevine Belgije, Kraljevine Nizozemske i Velikog Vojvodstva Luksemburg) o readmisiji i ponovnom vraćanju osoba koje su ušle i/ili borave bez ovlaštenja** (Ministarstvo sigurnosti BiH);
9. Davanje saglasnosti za ratificiranje **Sporazuma između Vijeća ministara Bosne i Hercegovine i Vlade Republike Slovenije o prihvatu osoba čiji je boravak nezakonit i Protokola između Vijeća ministara Bosne i Hercegovine i Vlade Republike Slovenije o provedbi Sporazuma između Vijeća ministara Bosne i Hercegovine i Vlade Republike Slovenije o prihvatu osoba čiji je boravak nezakonit** (Ministarstvo sigurnosti BiH);
10. Davanje saglasnosti za ratificiranje **Sporazuma o zračnom prometu između Vijeća ministara Bosne i Hercegovine i Vlade Republike Libanon** (Ministarstvo komunikacija i prometa BiH);
11. Davanje saglasnosti za ratificiranje **Sporazuma o zračnom prometu između Vijeća ministara Bosne i Hercegovine i Vlade Velike Socijalističke Narodne Libijske Arapske Džamahirije** (Ministarstvo komunikacija i prometa BiH);
12. Davanje saglasnosti za ratificiranje **Multilateralnog sporazuma o zračnom prometu između Europske zajednice i njezinih zemalja članica, Republike Albanije, Bosne i Hercegovine, Republike Bugarske, Republike Hrvatske, Bivše Jugoslavenske Republike Makedonije, Republike Island, Republike Crne Gore, Kraljevine Norveške, Rumunjske, Srbije i Privremene administrativne misije Ujedinjenih naroda na Kosovu o uspostavi Europskog zajedničkog zrakoplovnog područja - ECAA** (Ministarstvo komunikacija i prometa BiH);
13. Davanje saglasnosti za ratificiranje **Sporazuma o financiranju (Projekt registracije zemljišta) između Bosne i Hercegovine i Međunarodne asocijacije za razvoj - IDA** (Ministarstvo financija i trezora BiH);
14. Davanje saglasnosti za ratificiranje **Sporazuma o razvojnem kreditu (Projekt restrukturiranja obrazovanja) između Bosne i Hercegovine i Međunarodne asocijacije za razvoj** (Ministarstvo financija i trezora BiH);

15. Davanje saglasnosti za ratificiranje **Sporazuma o financiranju ECSEE (Projekt – Komponenta za Bosnu i Hercegovinu)** između Bosne i Hercegovine i Međunarodne asocijacije za razvoj (Ministarstvo financija i trezora BiH);
16. Davanje saglasnosti za ratificiranje **Okvirnog ugovora o kreditu: F/P 1523 između Bosne i Hercegovine i Razvojne banke Vijeća Europe – Projekt obnove Gimnazije Mostar** (Ministarstvo financija i trezora BiH);
17. Davanje saglasnosti za ratificiranje **Ugovora o financiranju između Bosne i Hercegovine i Europske investicijske banke – Projekt rekonstrukcije cesta u Republici Srpskoj** (Ministarstvo financija i trezora BiH);
18. Davanje saglasnosti za ratificiranje **Sporazuma o izmjenama i dopunama Ugovora o financiranju između Bosne i Hercegovine i Europske investicijske banke – Projekt za ceste Bosne i Hercegovine (Sarajevska zaobilaznica)** (Ministarstvo financija i trezora BiH);
19. Davanje saglasnosti za ratificiranje **Projektno-kreditnog sporazuma – Projekt unapređenja ruralnog poduzetništva - između Bosne i Hercegovine i Međunarodnog fonda za poljoprivredni razvoj - IFAD** (Ministarstvo financija i trezora BiH);
20. Davanje saglasnosti za ratificiranje **Okvirnog kreditnog sporazuma: F/P 1520 između Bosne i Hercegovine i Razvojne banke Vijeća Europe – Financiranje rekonstrukcije sustava primarne zdravstvene zaštite** (Ministarstvo financija i trezora BiH);
21. Davanje saglasnosti za ratificiranje **Sporazuma između Bosne i Hercegovine i Hašemitske Kraljevine Jordan o recipročnom unapređenju i zaštiti investicija** (Ministarstvo vanjske trgovine i ekonomskih odnosa BiH);
22. Davanje saglasnosti za ratificiranje **Trgovinskog sporazuma između Bosne i Hercegovine i Hašemitske Kraljevine Jordan** (Ministarstvo vanjske trgovine i ekonomskih odnosa BiH);
23. Davanje saglasnosti za ratificiranje **Sporazuma između Bosne i Hercegovine i Republike Indije o unapređenju i zaštiti investicija** (Ministarstvo vanjske trgovine i ekonomskih odnosa BiH);
24. Davanje saglasnosti za ratificiranje **Europske socijalne povelje (revidirana), Strasbourg, 3. svibnja 1996. godine** (Ministarstvo za ljudska prava i izbjeglice BiH);
25. Davanje saglasnosti za ratificiranje **Konvencije o zaštiti ljudskih prava i dostojanstva ljudskog bića po pitanju primjene biologije i medicine – Konvencija o ljudskim pravima i biomedicini i Dodatnog protokola** (Ministarstvo za ljudska prava i izbjeglice BiH);
26. Davanje saglasnosti za ratificiranje **Sporazuma između Visokog predstavnika za Bosnu i Hercegovinu i Bosne i Hercegovine o Uredu registrara za Odsjek I. za ratne zločine i Odsjek II. za organizirani kriminal, gospodarski kriminal i korupciju Kaznenog i Apelacijskog odjela Suda Bosne i Hercegovine, kao i Posebnog odjela za ratne zločine, te Posebnog odjela za organizirani kriminal, gospodarski kriminal i korupciju Tužiteljstva Bosne i Hercegovine, i o osnivanju Tranzicijskog vijeća kojim se zamjenjuje Sporazum o uspostavi Ureda registrara od 1. prosinca 2004. i Dodatka tog Sporazuma** (Ministarstvo pravde BiH);
27. Upoznavanje o aktima koji se odnose na Opće smjerove i prioritete za provedbu vanjske politike Bosne i Hercegovine i razmatranje Okvirnog radnog plana Komisije za vanjske poslove za 2007. godinu;
28. Tekuća pitanja.

Sjednicu je otvorila predsjedavajuća Komisije, Borjana Krišto i predložila da se dnevni red dopuni tačkom o Konferenciji predsjednika Komisija za vanjske poslove parlamenata zemalja članica Evropske unije, Evropskog parlamenta i parlamenata zemalja kandidata za prijem u članstvo u EU (COFACC), koja će se održati u Berlinu 26. i 27. februara 2007. godine.

Ovakav dopunjeni dnevni red usvojen je jednoglasno.

Ad.-1. Usvajanje Zapisnika Konstitutivne sjednice Komisije za vanjske poslove Predstavničkog doma Parlamentarne skupštine Bosne i Hercegovine, održane 21. februara 2007. godine.

Povodom Zapisnika Konstitutivne sjednice Komisije za vanjske poslove Predstavničkog doma Parlamentarne skupštine Bosne i Hercegovine, Denis Bećirović je dao primjedbu da u zapisnik nije unešen i njegov prijedlog da se za zamjenika predsjedavajuće Komisije za vanjske poslove izabere Sefer Halilović. Zapisnik je potom jednoglasno usvojen uz prihvatanje primjedbe da se dopuni ovim prijedlogom.

Ad.-2-26. Davanje saglasnosti za ratificiranje:

a) Sporazuma između Vijeća ministara Bosne i Hercegovine i Austrijske savezne vlade o readmisiji osoba koje imaju ilegalan boravak

Uvodnu riječ o sporazumu dao je Samir Rizvo iz Ministarstva sigurnosti BiH, naglasivši da je predmetni dokument potpisan u Beču, 05.05.2006. godine. Ovaj tzv. Sporazum o readmisiji je tipskog karaktera i odnosi se na readmisiju vlastitih državljana, potom na readmisiju državljana trećih zemalja kao i na lica bez državljanstva. Rasprave i pitanja koja se odnose na ovaj sporazum nije bilo, pa je Komisija jednoglasno odlučila dati prethodnu saglasnost za ratificiranje ovog Sporazuma.

- b) Sporazuma između Ministarstva sigurnosti Bosne i Hercegovine i Saveznog ministarstva unutarnjih poslova Republike Austrije o policijskoj suradnji**
- c) Sporazuma između Vijeća ministara Bosne i Hercegovine i Vlade Kraljevine Švedske o pojednostavljenoj proceduri readmisije osoba koje nemaju dozvolu za ulazak ili boravak**
- d) Sporazuma između Vijeća ministara Bosne i Hercegovine i Vlade Republike Slovačke o suradnji u borbi protiv kriminala, a posebice terorizma, nedozvoljene trgovine narkoticima i organiziranog kriminala**
- e) Sporazuma između Vijeća ministara Bosne i Hercegovine i Vlade Republike Slovačke o readmisiji osoba**
- f) Konvencije o policijskoj suradnji za Jugoistočnu Europu**
- g) Sporazuma između Bosne i Hercegovine i zemalja Beneluxa (Kraljevine Belgije, Kraljevine Nizozemske i Velikog Vojvodstva Luksemburg) o readmisiji i ponovnom vraćanju osoba koje su ušle i/ili borave bez ovlaštenja i Protokola o provedbi Sporazuma između Bosne i Hercegovine i zemalja Beneluxa (Kraljevine Belgije, Kraljevine Nizozemske i Velikog Vojvodstva Luksemburg) o readmisiji i ponovnom vraćanju osoba koje su ušle i/ili borave bez ovlaštenja**
- h) Sporazuma između Vijeća ministara Bosne i Hercegovine i Vlade Republike Slovenije o prihvatu osoba čiji je boravak nezakonit i Protokola između Vijeća ministara Bosne i Hercegovine i Vlade Republike Slovenije o provedbi Sporazuma**

između Vijeća ministara Bosne i Hercegovine i Vlade Republike Slovenije o prihvatu osoba čiji je boravak nezakonit

Povodom gore navedenih sporazuma, svih iz domena Ministarstva sigurnosti BiH, izvjestilac Samir Rizvo je dao objedinjeno objašnjenje, osim za Konvenciju o policijskoj saradnji za jugoistočnu Evropu, te kako nije bilo rasprave i pitanja, za sve sporazume je data prethodna saglasnost za ratifikaciju. No, Azra Hadžiahmetović je generalno uputila jednu sugestiju vezano za rokove ratificiranja. Naime, ona je ustvrdila da zakonodavstvo nekih zemalja omogućava tretiranje međunarodnih sporazuma fleksibilno i bez uslovljavanja zakonodavnim okvirom pošto neki sporazumi budu praćeni uslovom kašnjenja. Na to je uslijedio komentar predstavnika MVP-a BiH, Zorana Perkovića, koji je naglasio da ima slučajeva da se na postupak završavanja procedure oko nekih sporazuma čeka i po 2-3 godine. Period od početka do kraja te procedure, naime, nije limitiran rokovima, pa se i MVP BiH pridružio sugestiji da se preciziraju rokovi u kojima institucije treba da odrade svaka svoj dio posla u proceduri ratifikacije pojedinog međunarodnog sporazuma ili ugovora. Komisija se potom saglasila da uvijek treba insistirati da na sjednicama Komisije bude prisutan predlagač iz nekog od resornih državnih ministarstava kao i Ministarstva vanjskih poslova BiH. Bilo bi idealno ukoliko bi se na svakoj sjednici Komisije uspjelo osigurati prisustvo nadležnih ministara ili zamjenika, ali s obzirom da je to teško obezbijediti, neophodno je u ime predlagača osigurati službenog predstavnika određenog ministarstva kako bi oni dali neophodna pojašnjenja iz sporazuma članovima Komisije. Članovi Komisije su se, raspravljajući o ovome, također složili da u ukupnom smislu treba osigurati jačanje uloge Parlamenta u svim pitanjima vezanim za područje vanjske politike i, u okviru toga ratifikacije međunarodnih sporazuma i ugovora. Milorad Živković je, uzevši riječ, iznio stav kako se sporazumi trebaju ratifikovati uz prisustvo parlamentaraca, odnosno da se prati tok rada na sporazumu kako bi se donijela konačna odluka, a ne samo donijeti odluku o ratifikaciji. Dao je prijedlog da treba zadužiti Ministarstvo vanjskih poslova BiH za obavezno prisustvo poslanika prilikom kreiranja sporazuma, kako to ne bi bilo puko formalizovanje, tj. da parlamentarci budu članovi radnih grupa i u vezi sa Evropskom konvencijom o ljudskim pravima i ostalim međunarodnim konvencijama. Borjana Krišto je predložila da se posebno glasa o ovoj inicijativi da se resorna parlamentarna tijela uključuju u postupak pripreme generalne politike naše zemlje u određenom domenu. Predstavnik MVP-a BiH je dodao svoj komentar oko izmjena i dopuna sporazuma, posebno onih koji se odnose na rokove, i podržao stav da je potrebno pristupiti promjenama zakona o zaključivanju međunarodnih ugovora. Potom je Komisija jednoglasno podržala ovaj zaključak.

G. Živković je u svom obraćanju zamolio rukovodstvo i članove Komisije da ga oslobode, zbog obaveza predsjedavanja Predstavničkim domom, funkcije drugog zamjenika predsjedavajuće Komisije i da umjesto njega neko drugi preuzme ovo mjesto. No, kako nije eksplicitno dao prijedlog ko bi to mogao biti i ubrzo potom napustio sjednicu, Komisija je zaključila da će sačekati neku drugu sjednicu Komisije kako bi ovo pitanje stavila na dnevni red.

- i) Sporazuma o zračnom prometu između Vijeća ministara Bosne i Hercegovine i Vlade Republike Liban**
- j) Sporazuma o zračnom prometu između Vijeća ministara Bosne i Hercegovine i Vlade Velike Socijalističke Narodne Libijske Arapske Džamahirije**

Izvjestilac Ismet Šečić iz Ministarstva komunikacija i prometa BiH, objedinjeno je dao uvodne napomene vezane za ova dva sporazuma. Napomenuo je da su pregovori o sadržaju ovih sporazuma održani u Libanu i u Libiji, utvrđeni su na osnovu preporuka međunarodnih

agencija za civilnu avijaciju i potpuno su ispoštovani osnovi koje je utvrdilo Predsjedništvo BiH. G. Šečić je takođe naglasio da BiH u ovom momentu nema kompaniju na državnom nivou koja se bavi zračnim saobraćajem. Predstavnik Ministarstva vanjskih poslova BiH je dodao da je procedura vezana za ova dva sporazuma u potpunosti ispoštovana, te su članovi Komisije jednoglasno dali prethodnu saglasnost za njihovo ratificiranje.

k) Multilateralnog sporazuma o zračnom prometu između Europske zajednice i njezinih zemalja članica, Republike Albanije, Bosne i Hercegovine, Republike Bugarske, Republike Hrvatske, Bivše Jugoslavenske Republike Makedonije, Republike Island, Republike Crne Gore, Kraljevine Norveške, Rumunjske, Srbije i Privremene administrativne misije Ujedinjenih naroda na Kosovu o uspostavi Europskog zajedničkog zrakoplovnog područja – ECAA

Izvjestilac Ismet Šečić iz Ministarstva komunikacija i prometa BiH u uvodnim napomenama obavijestio je članove Komisije da je inicijativa za ovaj sporazum potekla od Evropske zajednice kako bi se povećala sigurnost u avio prevozu. Pregovori su vođeni dugo, s jedne strane Evropska zajednica a s druge strane evropske zemlje pobrojane u sporazumu. Sporazum je utemeljen na postavci o jedinstvenom zračnom prostoru i ima dvije faze: 1) primjenu zakonske regulative po kojoj sve kompanije iz BiH i Evrope imaju neograničeno pravo da lete preko BiH (prelazni period) i 2) faza kad se usvoji regulativa i donesu izmjene naših zakona i postigne se potpuno otvoreno tržište gdje avioni iz zemalja Evropske zajednice mogu da lete bez bilo kakve diskriminacije. Izvjestilac je naglasio da je ovaj sporazum okarakterisan kao vrlo pozitivan i bitan za našu zemlju. U raspravi koja je uslijedila Sefer Halilović je postavio dva pitanja: kad će BiH preuzeti kontrolu za zaštitu svog zračnog prostora i kada će doći do pojeftinjenja avio karata s obzirom da su one nevjerovatno skupe. G. Halilović je naglasio da građani BiH ne traže da karte budu jeftinije za nas nego iste kao i za građane EU. Na ova pitanja Ismet Šečić je odgovorio da je Vijeće ministara BiH usvojilo strategiju upravljanja zračnim prostorom, te da će se u Nedžarićima graditi centar za upravljanje zračnim prostorom te u Banja Luci i u Mostaru. Puno funkcionisanje CEA sistema se očekuje 2009. godine, čime bi se i trajno riješilo ovo pitanje. Kao odgovor na drugo pitanje g. Šečić je istakao da se tržište BiH smatra još uvijek tržištem sa velikim rizikom i da je to razlog što su avio karte skupe. Istovremeno je predložio da Ministarstvo komunikacija i prometa BiH treba intenzivno raditi na tome da se to promjeni, te da naša zemlja mora lobirati za niže cijene. Zatim je Denis Bećirović postavio pitanje da li će se centar za kontrolu zračnog prostora graditi u Sarajevu. Ako da, zašto samo u Sarajevu, Banja Luci i Mostaru. Koji kriteriji su uzeti? Zašto ne u Tuzli? Odgovoreno mu je da se išlo na to da se zadovolje entitetski principi. Azra Alajbegović je postavila pitanje vezano za kontrolu leta, koji profili stručnjaka, kontrolora će biti angažovani, te da li već postoje diplomirani stručnjaci ili će se obrazovati novi kadrovi u toj oblasti. Uslijedio je odgovor da će angažovani kadar biti srednja stručna sprema, a kriteriji za prijem će biti veoma oštri. Na kraju je predstavnik Ministarstva vanjskih poslova BiH, očitujući se po ovom sporazumu, iznio da je u cjelosti provedena procedura u Briselu i Luksemburgu i upozorio članove Komisije da mogućnost amandmana niti na ovaj sporazum niti na međunarodne sporazume generalno ne postoji, sporazum se može prihvatiti ili ne. Naglasio je da su sve zemlje EU pristupile tzv. jedinstvenom evropskom zračnom prostoru. Nakon ovoga su se članovi Komisije većinom glasova izjasnili za prethodno davanje saglasnosti za ratifikaciju ovog sporazuma.

l) Sporazuma o financiranju (Projekt registracije zemljišta) između Bosne i Hercegovine i Međunarodne asocijacije za razvoj - IDA

Izvjestilac iz Ministarstva financija i trezora BiH, Miroljub Krunić, dao je uvodna objašnjenja vezana za ovaj sporazum počevši od konstatacije da je ovo bila potrebna mjera kako bi se osiguralo jačanje javnog sektora. Sporazum je pripremljen u skladu sa Ustavom BiH, i odobren od strane Predsjedništva BiH. Kao komponenta strateškog ulaganja sporazum je finansiran od strane Svjetske banke po IDA uslovima. To konkretno znači da IDA ovim Sporazumom pruža BiH kredit u iznosu 10, 400.000 SDR (specijalnih prava vučenja). G. Krunić je napomenuo da BiH koristi nešto povoljnije IDA uslove, što znači da je kamatna stopa koja se odnosi na ovakve IDA aranžmane 0,75%, a vrijednost usluge za nepovlačenje je 0,50%. Ovo su uslovi tipični za Svjetsku banku. Sporazum se implementira preko Ministarstva financija i trezora BiH. Članovi Komisije su jednoglasno dali prethodnu saglasnost za ratificiranje ovog sporazuma.

m) Sporazuma o razvojnem kreditu (Projekt restrukturiranja obrazovanja) između Bosne i Hercegovine i Međunarodne asocijacije za razvoj

Isti izvjestilac je članove Komisije upoznao sa činjenicom da je BiH izjavila saglasnost za ključne reforme u oblasti obrazovanja. To se prije svega odnosi na srednje obrazovanje i podizanje kvalitete nastavnog osoblja kao i potrebe visokog i srednjeg obrazovanja. U načelu, radi se o promjeni osnovnih politika u oblasti obrazovanja. Želi se osigurati da se transfer javnog novca učini transparentnim. Radi se i na pripremi kvalifikacionog okvira za BiH kojeg treba pripremiti do 2010. godine kako bi se omogućio transfer obrazovanja. Vrijednost kredita je 6,7 miliona eura, od kojih se 3,8 miliona odnosi na projekat u FBiH, a 1,9 miliona na projekat u RS. Na pitanje Sefera Halilovića da li se nešto može uraditi vlastitim snagama da se BiH ne zadužuje u kredite koje je kasnije veoma teško vraćati, predstavnik Ministarstva financija i trezora BiH odgovorio je da je to vrlo teško realizirati. Objasnio je da su ovakvi sporazumi sastavni dio naše reforme koju treba sprovesti u oblasti obrazovanja i jedan vid stimulansa u tom smjeru. Vlastitim snagama se može dosta toga uraditi, ali se mora računati i na pomoć konsultanata jer obrazovanje mladih mora biti u skladu sa savremenim evropskim i svjetskim tokovima. Na ovo je Azra Hadžiahmetović uputila još jednu generalnu sugestiju koja predviđa da treba vidjeti sa predstavnicima Svjetske banke u BiH koliki je ukupan vanjski dug naše zemlje kao i otvoriti pitanje zaduživanja BiH, preko nadležnih ministarstava u Vijeću ministara BiH. Iznijet je stav da treba otvoriti inicijativu da se o ovim principijelnim pitanjima izjasni i odbor za finansije i budžet Predstavničkog doma PSBiH kad je u pitanju vanjsko zaduženje BiH. Na pitanje koje je uputila Azra Alajbegović koja je konkretno korist od ovog projekta, te šta je sa nostrifikacijom diploma i koji konsultacijski projekti će se poduzeti u tom smislu, odgovor izvjestioca je bio da će podrška u ovom projektu biti usmjerena uglavnom na srednje obrazovanje. Tu postoje tri osnovne stvari koje treba da se dostignu: 1) da se što prije približimo evropskim standardima, 2) područje srednjeg stručnog obrazovanja treba da bude više vrednovano i da se eliminiše ono što je nepotrebno kao i da se smanji neefikasnost u području obrazovanja, 3) da se transfer javnog novca učini transparentnim po jedinstvenim i sadašnjim kriterijima. G. Krunić je konstatovao da u ovom trenutku nisu dostignuti ciljevi u ovoj oblasti. Pojasnio je da postoje diferencirani ciljevi transfera javnog novca. Projekat EMSAC-a je imao veći odjek na području visokog obrazovanja. Konsultantske usluge će biti strane, i predviđeno je da se za njih raspišu tenderi, a strane usluge se preferiraju zbog većeg nivoa iskustava stranih eksperata. Na konstataciju Denisa Becirovića da je Ministarstvo civilnih poslova BiH osnovalo sekretarijat za koordinaciju projekta i za procjenu uslova, i njegovo pitanje da li je to plaćeno iz javnog novca, uslijedio je odgovor da će se projekat finansirati

uglavnom iz javnog novca i to tekući dio usluga. Nakon završene rasprave, Komisija je većinom glasova dala prethodnu saglasnost za ratificiranje i ovog sporazuma.

n) Sporazuma o financiranju ECSEE (Projekt – *Komponenta za Bosnu i Hercegovinu*) između Bosne i Hercegovine i Međunarodne asocijacije za razvoj

G. Krunić, pomoćnik ministra za finansije i trezor BiH je na početku naglasio da ovaj sporazum tretira finansiranje u infrastrukturu i da je odobren od nadležnih institucija te da je postignuta potpuna saglasnost za sve elemente sporazuma. Radi se o kreditu u iznosu od 25.100.000 SDR za pomoć pri financiranju dijelova A, B i C projekta koji se odnose na Elektroprivredu BiH, EPHZHB i EPRS. Bez rasprave je data prethodna saglasnost za ratificiranje ovog sporazuma.

o) Okvirnog ugovora o kreditu: F/P 1523 između Bosne i Hercegovine i Razvojne banke Vijeća Europe – *Projekt obnove Gimnazije Mostar*

Izvjestilac, g. Krunić je u objašnjenju rekao da je projekat potpisan od strane Razvojne banke Vijeća Evrope, a odnosi se na radove na rekonstrukciji školskog objekta u Mostaru. Iznos odobrenog kredita je 1.035 000 eura sa tranšama koje će biti povlačene na period od 20 godina. Ovaj projekat mora početi sa implementacijom u roku od 18 mjeseci što znači da to mora biti do marta ove godine. Implementacija ide preko nadležnih tijela FBiH. U nastavku je uslijedila rasprava i pitanje Denisa Bećirovića da li postoji podatak koliko je novca potrošeno na školske objekte i koji su kriteriji da je to baš Mostar. G. Krunić je odgovorio da on ne može odmah odgovoriti koliko je novca potrošeno u ove svrhe, ali postoji pregled stanja u oblasti obrazovanja pa se može izvršiti uvid, a na pitanje zašto baš Mostarska gimnazija, odgovor je bio da je Mostar je bio predmet pažnje i interesovanja OHR-a. G. Krunić je nadopunio svoja objašnjenja tvrdnjom da se Razvojna banka VE otvara sistemu dostupnosti sredstava za ovu namjenu, tako da BiH može aplicirati sa određenim projektima po vlastitom nahođenju. Komisija je potom većinom glasova dala prethodnu saglasnost za ratificiranje ovog sporazuma.

p) Ugovora o financiranju između Bosne i Hercegovine i Europske investicijske banke – *Projekt rekonstrukcije ceste u Republici Srpskoj*

Predstavnik Ministarstva financija i trezora BiH je u uvodu naznačio da je ovaj ugovor odobren od strane Predsjedništva BiH. On tretira ulaganja u RS i finansijske uslove koji su u skladu sa tržištem. Ugovorom je predviđeno da ukupni troškovi ovog projekta budu 80 miliona eura, sam kredit od banke iznosi 40 miliona, financiranje koje obezbijavaju druge međunarodne finansijske institucije je 38,2 miliona, dok su vlastita ulaganja RS 1,8 miliona eura. U raspravi koja je potom uslijedila Denis Bećirović je postavio pitanje da li se razmišljalo o projektu koji će obuhvatiti cijelu BiH ili je sama RS izašla sa ovakvim projektom i da li bi kao država izgledali ozbiljnije da smo izašli sa jednim projektom? G. Krunić je odgovorio da je identičan projekat predviđen i za FBiH i prošao je fazu potpisivanja, no još postoje neriješeni imovinsko pravni odnosi u vezi sa ulaganjem. U vezi s tim, kada je u pitanju projekat sarajevske zaobilaznice, BiH nema dovoljno vlastitih sredstava, a Koridor 5C je predmet pažnje međunarodnih institucija. Što se tiče jedinstvenog projekta, g. Krunić je objasnio da institucije nisu bile spremne sa dokumentacijom da bi mogle istovremeno kandidovati oba projekta, kao i da više faktora utiče na to. Na pitanje Azre Alajbegović koje su institucije bile zadužene za projektnu dokumentaciju, odgovor je bio da su to Direkcija za ceste FBiH i Javno preduzeće za puteve RS-a. Drugo pitanje gde

Alajbegović je bilo ko će preuzeti obavezu vraćanja ovog kredita, a odgovor je bio da će to biti Vlade entiteta. Potom su članovi Komisije dali prethodnu saglasnost za ratificiranje ovog ugovora.

q) Sporazuma o izmjenama i dopunama Ugovora o financiranju između Bosne i Hercegovine i Europske investicijske banke – *Projekt za ceste Bosne i Hercegovine (Sarajevska zaobilaznica)*

Izjavitelj, g. Krnić je objasnio da se ovaj projekat odnosi na izgradnju dionice puta vezane za koridor 5C, i zadržava svoju aktuelnost iz projekta „Putevi BiH“, plus neriješeni dio projekta. To je područje Blažuja, tako da bi se podržao sadržaj koridora 5C. Projekat je odobren od nadležnih institucija, ali je u fazi rješavanja imovinsko pravnih odnosa. Vrijednost cijelokupnog projekta je 117.711 miliona eura, od kojih su kredit EIB-a 36.417 miliona, kredit EBRD-a za radove je 37.210 miliona, zajam OPEC Fonda 15.000 miliona, a vlastita sredstva FBiH iznose 29.084 miliona eura. U raspravi o ovom ugovoru Denis Bećirović je upitao postoji li kakav projekat koji treba zaustaviti saobraćanu i prostornu izolovanost dijela sjeveroistočne Bosne. G. Krnić je odgovorio da je projekat Putevi BiH projekat koji je implementiran, a pošto su prošli rokovi, ušlo se u ovaj projekat i ovo je samo jedan izlaz. Ustvrdio je da se na koridor 5C računa kao na ključnu saobraćajnicu kroz našu zemlju te da bi BiH, ukoliko bi kasnila sa ovim projektom, bila prepuštena izolaciji. Komisija je zatim dala prethodnu saglasnost za ratifikaciju ovog ugovora.

r) Projektno-kreditnog sporazuma – *Projekt unapređenja ruralnog poduzetništva - između Bosne i Hercegovine i Međunarodnog fonda za poljoprivredni razvoj – IFAD*

Ovaj projekat se odnosi, kako je rekao g. Krnić, na poljoprivredni sektor kako bi se povećala konkurentnost u ovoj oblasti. Cjelokupan projekat treba biti finansiran preko bankarskih institucija, a pretežan obim sredstava išao bi na područje proizvodnje mlijeka, te voća i povrća. Odobreni kredit iznosi 8.800.000 SDR. Bez rasprave je jednoglasno data prethodna saglasnost za ratificiranje ovog sporazuma.

s) Okvirnog kreditnog sporazuma: F/P 1520 između Bosne i Hercegovine i Razvojne banke Vijeća Europe – *Financiranje rekonstrukcije sustava primarne zdravstvene zaštite*

G. Krnić je za ovaj sporazum naglasio da se radi o projektu u obimu od 14 miliona US dolara u tranšama za period od 20 godina uključujući do 5 godina grejs perioda. Koncesionalni uslovi ovog kreditnog sporazuma su sa ciljem da se podigne kapacitet zdravstvene infrastrukture u BiH. Na pitanje Azre Hadžiahmetović zašto ovaj sporazum još nije ratifikovan, odgovor je glasio da se kasni prvenstveno zbog duge parlamentarne pauze, potom duge i komplikovane procedure te isključivo produženih administrativnih rokova. Uz zajedničku konstataciju članova Komisije da se radi o dobrom projektu, data je prethodna saglasnost za ratificiranje ovog sporazuma.

š) Sporazuma između Bosne i Hercegovine i Hašemitske Kraljevine Jordan o recipročnom unapređenju i zaštiti investicija

Izjavitelj Ministarstva za vanjsku trgovinu i ekonomske odnose BiH, Safet Šerifović je, dajući uvodne napomene, kratko objasnio da je ovo tipičan sporazum kakvih smo do sada

zaključili 40. Osnova ovog sporazuma je nacionalni tretman i tzv. tretman najpovlaštenije nacije. Saglasnost za ratificiranje ovog sporazuma je data jednoglasno.

- t) Trgovinskog sporazuma između Bosne i Hercegovine i Hašemitske Kraljevine Jordan**
- u) Sporazuma između Bosne i Hercegovine i Republike Indije o unapređenju i zaštiti investicija**

Izjavitelj Safet Šerifović, pomoćnik ministra za vanjsku trgovinu i ekonomske odnose BiH je objedinjeno govorio o ova dva sporazuma, naglašavajući da su oni nešto manje tipski nego što je to uobičajeno i do sada je zaključeno 12 ovakvih bilateralnih trgovinskih sporazuma sa ista dva tretmana kao i u prethodnom. Članovi Komisije su bez rasprave jednoglasno dali prethodnu saglasnost za ratificiranje ova dva sporazuma.

v) Evropske socijalne povelje (revidirana), Strasbourg, 3. svibnja 1996. godine

O ovom međunarodnom ugovoru je ispred Ministarstva za ljudska prava i izbjeglice BiH govorila Amela Hasić. Ona je odmah istakla da je ovo ministarstvo bilo resorno, s obzirom da ne postoji ministarstvo na državnom nivou koje tretira ovo pitanje. Revidirana ekonomsko socijalna povelja je potpisana u Strazburu, 3. maja 1996. godine i nakon toga se pristupilo ratifikaciji. Trebalo je prihvatiti 16 članova, odnosno numerisanih tačaka, koji se odnose na različita prava na radu, socijalnu i zdravstvenu zaštitu, pravnu i ekonomsku zaštitu, prava djece i mladih, žena i starih osoba itd. Zatim je otvorena rasprava. Azra Alajbegović je postavila pitanje u vezi roka od 16 sedmica za porodijsko odsustvo i člana 23. u vezi sa pravom starih i iznemoglih uz konstataciju da BiH uopće nema institucije koje bi zaštitile prava starih osoba. Takođe, socijalna i zdravstvena služba se susreću sa ogromnim problemima. Gđa Alajbegović je preporučila da se Evropska socijalna povelja obavezno proslijedi i nadležnim entitetskim ministarstvima uz uvjerenje da su ministarstva za rad i socijalne potrebe na entitetskom nivou obavezni da usklade svoje propise sa poveljom. Potom je jednoglasno data saglasnost za ratifikaciju revidirane Evropske socijalne povelje.

z) Konvencije o zaštiti ljudskih prava i dostojanstva ljudskog bića po pitanju primjene biologije i medicine – *Konvencija o ljudskim pravima i biomedicini* i *Dodatnog protokola*

Ista predstavnik Ministarstva za ljudska prava i izbjeglice BiH, gđa Hasić je rekla da je ovaj protokol svojevrsna nadopuna Evropske konvencije o zaštiti ljudskih prava, te da je ona veoma bitna jer BiH nema Ministarstvo zdravlja na državnoj razini. Napomenula je i da su Konvencija i protokol o presađivanju ljudskih organa i zabrani kloniranja prošli svu neophodnu proceduru i pripremljeni su za ratifikaciju. Članovi Komisije su potom jednoglasno dali pozitivno mišljenje za ratifikaciju ove Konvencije.

ž) Sporazuma između Visokog predstavnika za Bosnu i Hercegovinu i Bosne i Hercegovine o Uredu registrara za Odsjek I. za ratne zločine i Odsjek II. za organizirani kriminal, gospodarski kriminal i korupciju Kaznenog i Apelacijskog odjela Suda Bosne i Hercegovine, kao i Posebnog odjela za ratne zločine, te Posebnog odjela za organizirani kriminal, gospodarski kriminal i korupciju Tužiteljstva Bosne i Hercegovine, i o osnivanju Tranzicijskog vijeća kojim se zamjenjuje Sporazum o uspostavi Ureda registrara od 1. prosinca 2004. i Dodatka tog Sporazuma

Izvjestilac po ovom sporazumu je bio Jusuf Halilagić, sekretar Ministarstva pravde BiH. On je kratko pojasnio da se ovim sporazumom zamjenjuje raniji i u kojem su precizirane funkcije ureda registrara, njegov mandat, odgovornosti, kao i uloga Tranzicijskog vijeća i Upravnog odbora. Kako po ovom sporazumu nije bilo pitanja ni rasprave, data je jednoglasno saglasnost za njegovo ratificiranje.

Ad.-27. Upoznavanje sa aktima koji se odnose na Opće smjerove i prioritete za provedbu vanjske politike Bosne i Hercegovine i razmatranje Okvirnog radnog plana Komisije za vanjske poslove za 2007. godinu

O ovoj tački dnevnog reda uvodnu riječ je dala predsjedavajuća Borjana Krišto. Rečeno je da je Okvirni radni plan Komisije za vanjske poslove sačinjen na osnovu dokumenta Predsjedništva BiH „Opći smjerovi i prioriteti za provedbu vanjske politike Bosne i Hercegovine“ kao i zaključaka Predstavničkog doma PSBiH. Članovi Komisije su se složili da do jedne od narednih sjednica daju svoje primjedbe, prijedloge i sugestije na ovaj plan, te da se on što prije dostavi Predstavničkom domu PSBiH kako bi ovaj mogao na osnovu tog dokumenta napraviti i svoj plan rada za ovu godinu. Azra Hadžiahmetović je izrazila svoje zadovoljstvo predloženim planom rada Komisije te prisustvom ministra vanjskih poslova prvoj radnoj sjednici Komisije i posebno ovoj tački dnevnog reda. Dodala je da ova Komisija ima veoma značajnu ulogu u predstavljanju vanjske politike BiH u inostranstvu te da zajedno sa Grupama prijateljstva i parlamentarnim delegacijama u značajnim međunarodnim multilateralnim organizacijama, treba još više doprinositi boljoj slici BiH u Evropskoj uniji i svijetu.

Zatim je ministar vanjskih poslova BiH, Sven Alkalaj, iznio svoje mišljenje po pitanju Okvirnog radnog plana Komisije za vanjske poslove i istakao kako je to vrlo važan dokument koji bi eventualno imao stanovite korekcije tokom godine jer će istovremeno doći i do mijenjanja sveukupne platforme vanjske politike, njene konkretizacije i ažuriranja, te da plan treba slijediti dinamiku koja nameću vanjskopolitička dešavanja. Dodatan elemenat u ovom kontekstu je i Sporazum o stabilizaciji i pridruživanju sa EU koji će takođe pomoći u definisanju konkretnih smjernica i kojim bi se Komisija za vanjske poslove Predstavničkog doma trebala baviti s jednakim angažmanom kao i Zajednička komisija za evropske integracije PSBiH. G. Alkalaj je takođe istakao kako bi se trebala promijeniti dosadašnja praksa po kojoj nije bilo dobre koordinacije i redovne komunikacije između ambasada BiH u svijetu i parlamentaraca. Predstavio je ideju po kojoj bi se trebao otvoriti kanal komunikacije dnevne veze između ova dva subjekta, po kojoj bi se možda i zadužila jedna osoba ili odjel unutar Ministarstva vanjskih poslova BiH koji bi isključivo bio zadužen za odnose sa PSBiH. Ovakvo unapređenje saradnje podrazumjevalo bi, između ostalog, i pomoć parlamentarcima tokom njihovog boravka u stranoj zemlji, kratki brifing vezan za aktuelne teme kao i pripremni materijal koji bi im bio poslat prije puta. Time bi se unaprijedila saradnja, došlo bi do bolje komunikacije i ne bi bilo zastoja u radu. Kao zaključak ministar je istakao da podržava Okvirni radni plan Komisije jer predstavlja odličnu osnovu za rad, ali je naglasio i da je to dinamičan materijal podložan promjenama koji se uvijek može i mora unapređivati i dograđivati.

Ad.-28. Tekuća pitanja

Ovdje se razgovaralo o Konferenciji predsjednika Komisija za vanjske poslove parlamenata zemalja članica Evropske unije, Evropskog parlamenta i parlamenata zemalja kandidata za prijem u članstvo u EU (COFACC), koja će se održati u Berlinu 26. i 27. februara 2007. godine. Sekretar Komisije Merdžana Iglica dala je kratko objašnjenje o COFACC-u kao

i o novoformiranoj parlamentarnoj Grupi prijateljstva BiH unutar njemačkog Bundestaga nakon čega je predsjedavajuća Komisije Borjana Krišto izjavila da će biti spriječena da učestvuje na ovoj konferenciji pa je predložila Azru Hadžiahmetović, prvu zamjenicu predsjedavajuće, da učestvuje na pomenutoj konferenciji. Zatim je g. Alkalaj izrazio svoje zadovoljstvo formiranjem parlamentarne Grupe prijateljstva sa BiH unutar njemačkog Bundestaga jer to znači da je Njemačka zainteresirana za jačanje parlamentarne saradnje između dviju zemalja, kao i generalno za stanje u BiH. Takođe je istakao važnost COFACC-a u evropskoj perspektivi BiH i rekao da je jako bitno da predstavnici PSBiH i Komisije za vanjske poslove uzmu učešća u radu ove konferencije.

Kako je ovim iscrpljen dnevni red 2. sjednice Komisije za vanjske poslove, sjednica Komisije je završena u 16 sati i 30 minuta.

SEKRETAR KOMISIJE ZA VANJSKE POSLOVE
Merdžana Iglica

Kopija: MVP-u BiH